

LVMIERES

POVR L'HISTOIRE
DE CE TEMPS,

OV

LA REFVTATION DE TOVS

les Libelles & Discours faits contre l'autorité

Royale durant les Troubles à Paris.

Auec les motifs de la stabilité & durée de la
Paix, contre l'opinion du vulgaire.

Fiat pax in virtute tua, & abuntia in turribus tuis.

Psalm. 121.



A PARIS.

M. DC. XLIX.

AV LECTEUR.

CHER Lecteur, ie croirois attirer les vengeances du Ciel si ie blasmois icy quelqu'un ; c'est pourquoy si quelques mots te choquent dans ce discours, il faut les attribuer, non pas à des personnes publiques, mais aux *Autheurs* de certains *Libelles* & *Discours* malfaits qui ont couru dans Paris, sans aucune permission ny approbation du Parlement, qui a tousiours tasché d'en arrester le cours par ses soins pleins de zele pour le public: parce que ces papiers seruent seulement à allumer le feu de quelque sedition, & ces *Discours* Satyriques irritent le Ciel contre nous, & empeschent Paris de gouster la douceur de la Paix. Si tu reçois de bon cœur le commencement de ces *Lumieres*, ie tascheray de leur donner plus d'éclat la seconde fois, & te feray voir une ample refutation des *Libelles* & *Discours* diffamatoires, avec quelques observations sur la conduite du Cardinal Mazarin. Cependant réjouy toy de ce que tu pens voir la vérité en paix & en liberie.



LVMIERES POUR L'HISTOIRE
DE CE TEMPS,

*Où la Refutation de tous les Libelles & Discours
faits contre l'autorité Royale, durant
les troubles à Paris.*

COMME les Nautonniers au milieu des orages & des tempestes, nourrissent tousiours dans leurs cœurs quelque esperance de tranquillité, & ne plongent iamais tout ensemble leurs richesses dans la mer, & leurs esprits dans le desespoir, mais releuent tousiours leurs esperances, à mesure que la rage de la mer & des vents semblent enleuer leurs vies, & esperent voir la fin de leurs tourmens dans la fin de la tempeste: Ainsi Paris parmy les horreurs de la guerre, conseruoit le desir de la paix, & le portoit par tout avec les armes. Elle regardoit la guerre comme vn chemin qui la conduisoit à la paix, & marchoit librement par dessus les dangers pour arriuer à la tranquillité, qui estoit en prison à saint Germain, & sembloit exhorter cette noble Ville de luy oster ses chaines qui la retenoient aupres de la Reyne, par ses respects & soumissions ordinaires, & de ramener avec elle son Roy & sa bonne Reine, & avec eux sa gloire & son bonheur, & la ioye des Peuples dans l'enceinte de ses murailles. Nos souspirs sembloient aller à saint Germain, pour hastier le retour de cette Deesse, qui fait tousiours marcher devant soy l'abondance. Nos respects l'ont attirée, & nous nous sommes vnis avec elle eternellement par les mesmes chaines, avec lesquelles la Reine la retenoit aupres de sa Majesté.

Le retour de la Paix a choqué beaucoup d'esprits malfaits,

& d'un contrecoup a ébranlé plusieurs ceruelles du vulgaire, qui s'arrestent à ce qu'on dit, & ne considerent point ce qu'on deuroit dire. Ils se rendent malheureux dans de vaines pensées de mal, & composent à leur mode au Cardinal Mazarin vne Politique, qui n'a point d'autre fondement que leur imagination seule. Cette Paix (disent-ils) est vn chemin à vne plus cruelle guerre : on les a trahis, on a vendu leurs vies & leurs fortunes.

Pauvre Peuple de Paris, que ie plains ta credulité. Certains discours malfaits t'attirent plus facilement que la bonté de ton Roy, qui te redonne avec la Paix, ta vie & tes biens. Certains esprits qui se plaisent dans la diuision, ont cét auantage sur toy, qu'ils diuisent ta volonté, qui naturellement se porte à la concorde, & la font tantost par leurs Discours, tantost par leurs Libelles, pancher laschement à la discorde. Tout ce qui m'est insupportable, & ce qui ruine l'estime que tu t'estois acquis aupres de toutes les autres Nations, c'est que tu n'escoute pas seulement leurs crimes, tu ne les conserue pas dans ton cœur, mais tu les suis dans leurs pensées: tu parles comme eux, & recites par tout comme de petits enfans la leçon de ces mauuais maistres. Si tu participois à la ioye qu'ils ont, de rencontrer aupres de toy de l'approbation, ie pardonnerois à ta simplicité, mais tu ne scaurois approuuer leurs Discours, sans approuuer la crainte qui te glace le cœur, qui te fait regarder ton Roy (vn Roy naturellement bon, vn Roy du Ciel, puis qu'il nous l'a donné) comme vn tyran, vn traistre, vn Neron, & comme ton capital ennemy, qui te fait viure dans la defiance, plustost que dans l'obeissance, plustost dans la haine contre les personnes qui sont aupres de sa Maiesté sacrée, que dans l'amour que tu dois à sa bonté Royale? Simple Peuple de Paris, que ie plains ta simplicité, n'accuse point le Cardinal, accuse ta seule simplicité, c'est la source de toutes tes craintes & de toutes tes miseres. Rappelle le commencement de tes troubles, ne tenois tu pas la victoire, & ta credulité ne l'a-elle pas donné de franc cœur à ceux qui ne pouuoient approcher de toy sans soupçon : c'estoit en ce temps que ta defiance deuoit chercher sa seureté. Il n'est plus temps de craindre dans la paix, ce qu'on deuoit faire dans la guerre : toutefois tu dois estre bien aise d'auoir esté dup-

pe,

pè, puis que ta simplicité a donné occasion à quelques-vns de servir ton Roy, que ie croy que tu desires estre seruy, mesme aux despens de ton honneur, & de ta propre vie. C'est pourquoy ie suis bien aise, que tu aye esté facile à persuader en ce temps-là, puis que ta persuasion a osté l'occasion aux seditieux de faire perir par tes propres mains ton propre & legitime Roy; mais ie suis fâché que maintenât tu sois facile à persuader, aux despens de ton honneur & de ton repos, à la ruine de ton pays & de la Monarchie. Tu sçais fort bien que c'est vne legereté, que de croire ainsi legerement que ton Roy te fait la guerre, lors qu'il te donne la paix. Tu sçais que c'est cette desiance, qui esloigne avec la Maïesté ton bonheur & ton repos de roy. Car serois tu encore assez simple, pour croire que les Personnes Royales se croiroient en assurance aupres de ta desiance: Non non, ie croy que tu n'es point credule iusques à ce point. Veux-tu que ie te die vn secret de ramener ton Roy dans ta Ville, peut estre que tu aies des que ie te persuade de faire à son merite vne entrée magnifique, de tapisser les ruës, de faire bruler des feux de ioye, qui tesmoignent que tu brûles d'affection pour luy, de payer librement les entrées, enfin d'employer ton argent dans des dépenses magnifiques tout ensemble & inutiles. Rien de tout cela. Je te persuaderay seulement de demeurer dans la tranquillité qu'il t'a donnée; si ie t'exhortois à dōner au merite de leurs Maïestez quelque chose de pompeux & de magnifique, tu volerois de ioye. Je te dis seulement, demeure en paix, élue dans ton cœur vn autel magnifique à ton Roy, fay le triompher de toy, & non pas dans les ruës, & tu te moques de moy, & ainsi estouffant dans ton ame, toutes les assurances d'vne paix stable & assurée, tu donnes entrée à des opinions scandaleuses à toy & à la posterité, & par vne simplicité sans pareille, tu donnes des ailes aux seditieux, pour voler iusques à l'autorité Royale.

Si ie pouuois t'interroger sans te reprocher ton crime, ie te demanderois les motifs qui te font viure en desiance, sur quels fondemens tu l'establis, & enfin quel est son obiect.

Les approches d'vn ennemy, qui en approchant de nous, fait approcher nos miseres, nous doit faire apprehender les malheurs dont il nous menace. Lors qu'Alexandre sortoit de son Royaume, & faisoit marcher deuant soy la Victoire, on voyoit

la crainte qui alloit aduertir les Nations de l'arriuée de ce Conquerant dans leurs terres. Lors qu'Annibal sortoit de Carthage, on voioit Rome la superbe renfermer toutes les esperances dans l'enceinte de ses murailles. Lors que nostre second **ALEXANDRE** mit en prison l'Ocean deuant la Rochelle, tout aussi-tost la crainte lia les cœurs de ses Citoyens; enfin la crainte nous apporte tousiours les nouuelles de quelque malheur qui nous menace. Pauvre Peuple, quel malheur te menace, on te donne la Paix, est-ce te donner la guerre, mere seconde en miseres? On te donne avec l'abondance la vie, est ce te donner la mort? Tu regardes possible ton Roy, comme les Nations du monde regardoient Alexandre, qui portoit par tout la victoire & la misere. Ouy, il faut que tu le consideres comme vn Alexandre, qui te rendra le Maistre des autres Peuples, & non pas comme vn Prince Estranger, qui te rendra esclau de ses passions. Peut estre que tu le regarde comme vn Annibal, qui ne sçauoit entrer avec sa Cour dans ta Ville; sans y faire entrer la desiance & la tyrannie. Seroit-il bien possible que ces pensées criminelles eussent logé vn moment dans ton ame. Pour moy ie ne sçauois penser sans larmes que tu l'aye fait, & ie voudrois pouuoir me tromper dans vne chose qui n'est que trop vraye. N'est-il pas vray, pauvre Peuple, que tu crois que le Roy nourrit aupres de sa Personne des tyrans qui forment tous les iours les desseins de ta ruine? Helas, c'est toy qui les forme dans ton imagination. Ta simplicité fait vne Politique nouuelle aux Fauris de ton Prince, qui les destruit eux mesmes, en croyant qu'elle te destruira. As-tu la lascheté de croire que ton Roy soit assez lasche pour trahir ses Subiets, ne se ruinerait il pas luy mesme en te ruinant. Oster les Subiets, n'est-ce pas oster le Prince, comme d'oster les creatures, c'est oster le Createur. On a veu les Cefars au sommet du bonheur; pourquoy? parce que leurs Subiets les y eleuoient. Il est impossible de monter à l'Empire du monde tout à fait par la misere des autres. Le seul bonheur des Subiets, fait au Prince vn chemin à la gloire. Repasse par ta memoire tous les tyrans, ils ont subsisté quelque tēps, mais enfin ils sont tombez apres la cheute de leurs Subiets. Si tu adioustes foy à tout cela, pourquoy ne croiras-tu point que ton Prince soit amy de ton bonheur, n'estant pas ennemy du sien, &

ayant deuant les yeux l'exemple des Bourbons qui ont finy, & finiront tousiours en bons, & qui ont tousiours cherché leur gloire dans celle de leurs Subiets. Tu ne sçauois donc nier que ton Roy est la source de ton bien, & que tu es reciproquement sa gloire, & qu'en la conseruant, il te conseruera inuiolablement.

Ouy, mais le Cardinal est aupres de sa Personne, qui luy inspire des sentimens de vengeance, & contraint doucement sa volonté, qui est encore tendre de descendre dans ses inclinations, qui ne tendent qu'à eleuer sa gloire & son bonheur sur les ruines de Paris & de toute la France. Il n'est pas possible qu'ayant esté offensé griefuement, il ne conçoie des pensées & des desseins de vengeance.

Bon Dieu! est-il possible que tu offenses non seulement les personnes qui sont aupres de ton Prince, mais luy mesme, non seulement ton Prince, mais encore celuy qui vn iour te fera voir à ta confusion latemerité de tes iugemens, & qui s'est reserué de iuger vn iour les hommes. N'as-tu pas autant de raison de croire que le Cardinal ne se vengera pas, côme d'asseurer qu'il se vengera. Tu dis qu'il se vengera, parce qu'il a esté trop griefuement offensé, & moy ie crois qu'il ne se vengera pas, parce que son Maistre & son Roy a pardonné. Voudroit-il se venger à son prejudice? Pour donner cours à ce dessein, il faudroit premiere-
 ment qu'il fust violer au Roy contre le droit des gens la Paix sainctement signée, & fouler aux pieds ce precieux don du Ciel, que les Nations les plus Barbares ont religieusement reueré & gardé inuiolablement; Il faudroit qu'il fust rompre au Roy ses sacrées chaines qui ont vny les Nations les plus des-
 vnies; il faudroit qu'il estoufist dans le cœur de la Reine la pieté & l'amour naturel enuers ses Subiets. Il faudroit qu'il allast chercher des armes parmy les Barbares, & non pas parmy les François: Il en a trouué, ie le veux, au milieu de la France. Ouy des Barbares, & non pas de vrais François, des François, ie le veux, mais qui combattoient sous l'autorité de leur Roy, deuant que la Paix fust signée, lors que les vns & les autres cherchoient leur defense dans leurs armes. Si tout cela luy est impossible, il en est de mesme de la vengeance. Outre cela, ie croy que son Eminence a tant d'amour pour son Roy, & la Reine sa

bienfaitrice, qu'il ne voudroit pas les ruiner, en ruinant leurs Subiets, ſachant fort bien qu'il y a plus de generoſité & plus de merite à eſtoufer les deſirs de vengeance, qu'à les armer contre les Peuples.

Je crois auoir ruiné les fondemens de ta deſiance; voyons quel eſt l'obiet de ta crainte. La Paix te fait trembler au lieu de t'aſſurer: Il faut donc neceſſairement que ce ſoit le Roy qui te l'a donnée, qui ſoit l'obiet de ta deſiance. Peuple également malheureux dans ta crainte & dans ton aſſurance. Helas, il y a quelque temps que tu cherchois ta ſeureté dans des ſuiets de crainte, & maintenant tu cherches de la crainte dans l'aſſurance meſme. L'innocence de ton Roy, ce preſent du Ciel, qui arreſte les coleres de Dieu, que tu reſſentirois aſſurément pour tes crimes, te fait craindre. Tu le regardes comme ton Roy veritable, mais comme vn Prince, entre les mains duquel Dieu a mis ſes foudres pour te punir. Quand cela ſeroit, tu deurois benir ces aimables mains, & louer Dieu de ce qu'il te chaſtie par les mains de ton Prince naturel, & non pas par celles d'un Eſtranger. Vn Roy ſi bon, chery du Ciel & de la Terre, te deuroit faire apprehender, mais ſeulement ſa perte. Tu reſponds à tout cela, qu'il n'y a que les perſonnes qui ſont aupres du Roy dont tu crains les armes. Vn Cardinal Eſtranger, qui a la puiffance en main, t'en fait apprehender les effets, comme j'ay deſia dit, ce ſeruiteur ne voudra pas deſtruire ſon maiſtre en te deſtruiſant. Les bienfaits qu'il a receus de luy, luy feront tourner ſes armes & ſa puiffance contre les Ennemis de l'Eſtat. Mais il eſt Eſtranger, c'eſt pourquoy il veut ruiner la France. Voila mal conclu, eſt-ce que les Eſtrangers ſont tous melchans, & qu'il faut naiſtre dans la France pour eſtre honneſte homme? Ceux qui concluent de la ſorte, ſont auſſi ſtupides, que ceux qui inferent que quelqu'un eſt melchant, parce qu'il eſt Normand, comme ſi naiſſant en Normandie, il naiſſoit au vice, & non pas à la vertu, comme ſi Dieu donnoit aux Normands vn ame de demon. Le climat ne fait point les vertueux, mais la ſeule vertu. C'eſt pourquoy ces conſeils ſe reſutent elles meſmes. Il ne faut donc point craindre la puiffance de ſon Eminence, puis qu'embralſant la Couronne, il l'attireroit dans la ruine de la France, & le Sceptre eſtant vne fois tombé, on verroit l'Eminence à bas.

Toutes

Toutes ces veritez estans bien establies , à quoy bon se rendre malheureux soy mesme , par vne desiance hors de saison? On a vendu ta vie? Si tu auois pour fondement de tes autres vertus l'humilité Chrestienne , tu croirois que la marchandise est si vile , qu'on n'aura pû trouuer Marchand : Mais l'ambition te fait conceuoir des pensées bien plus hautes , pourueu que tu lises quelque Libelle , ou qu'on te dise que ta cause est iuste. Tu demandes la guerre , & portes tes esperances iusques à la victoire.

Demander la guerre , c'est parler en beste , *bellum à belluis*, c'est se bander contre son bonheur , & embrasser sa ruine ; c'est se montrer ennemy de soy-mesme & des autres. Ceux qui cherchent la guerre , sont semblables à ces furieux , qui cherchent vn poignard pour s'arracher la vie. Car la guerre est le commencement de tous maux , & le point où finissent toutes sortes de biens : c'est pourquoy les Hebreux l'appellent fort bien מלחמה *mil chamáh*, c'est à dire , *broute-tout*. Lors que les Poètes veulent exprimer quelque grand malheur , ils nous descriuent la Deesse de la guerre avec son foïet trempé dans du sang.

Quam cum sanguineo sequitur bellona flagello. Virg. 9. Æneid.

Cette Deesse se plaist parmy les carnages , elle remplit les Temples & les Autels du sang de ceux qui sont à sa suite. Elle n'espargne pas mesme ses Prestres, il falloit anciennement qu'ils espuisassent de sang leurs veines pour en arrouser ses Autels. *Bellonarij, id est sacerdotes bellona lacertos humerosque concidebant, sanguine suo bellona sacrificantes.*

Arrache donc, pauvre Peuple de Paris, de ton ame ces veines pensées d'ambition : Songe à la Paix , & non pas à la guerre : demeure en Paix , & non pas dans la crainte de la guerre. Rappelle ton Roy par vne genereuse assurance , & ne l'esloigne pas dauantage par vne lasche desiance. Arreste le cours de tant de discours , qui te rauissent la douceur, que les bonnes ames goustent dans vne parfaite tranquillité. Il n'est plus temps de trembler : tu vois ton Roy qui tourne ses armes contre tes ennemis naturels , pour les contraindre à te donner vne Paix glorieuse , & à reconnoistre enfin que la generosité des François est toujours egale , & comme le diamant, resiste tout ensemble & esclate par tout.



LUMIERES DE LA VERITE',

*Ou le mensonge reconneu dans les Libelles dif-
famatoires publiez dans Paris sans permission,
depuis le mois de lanuier iusques au mois de
May mil six cens quarante-neuf, contre la
conduite des personnes Royales & Publiques.*

LES discours que les meschans esprits ennemis de la Concorde sement dans le vulgaire, passent seulement de l'ame dans l'oubly, & sont presques estoufez dans leur naissance, & comme ils sont de vent, ils en ont la durée, tant il est vray, que tout ce qui n'a point pour fondement la vertu, ne dure que pour ne durer point. Mais les escrits demeurent, & il semble que les calomnies trouuent plus de fondement dans du papier, que dans le cœur des hommes.

Ce qui a paru & paroist dans ce temps, où les Calomniateurs distribuent leurs crimes, & les font paroistre parmy les troubles, & ainsi mettent la mesdisance en liberté, & la Vertu & la Verité en prison.

Les personnes desinteressées & qui aiment la Verité, auroient maintenant suiet de desirer, que les meschans Escruiains de ce temps fussent condamnez aux mesmes peines, qu'autrefois on faisoit souffrir dans Lion à leurs semblables.

*Palleat ut duris pressit qui gressibus anguem,
Aut Lugdunensem Rhetor dicturus ad aram.*

La riuere de Seine ne pourroit lauer leurs crimes, & ils ne pourroient iamais oster avec leurs langues infames, les calomnies dont ils ont couuert presque tout le papier de Paris.

La mesdisance obscurcit la renommée d'autrui, mais elle n'en

peut courir d'un nuage les actions, sans qu'elle s'obscurcisse soy mesme. Les Libelles qui ont couru dans Paris pendant les troubles, en voulant confondre les autres, se sont trouvez eux-mesmes dans la confusion, & en voulant troubler les autres, on a reconnu qu'ils ne pouuoient subsister que dans les troubles, & dans la famine, où l'on se repaissoit de vent. C'est pourquoy ie neveux point icy employer mon esprit pour les refuter, parce que le nombre en estant fort grand, on iugera aisément que les veritez sont un peu trop rares & trop cheres dans Paris, pour estre si communes & à si bon marché. Ceux qui ont esté indignement traitez dans ces Libelles, auront cette consolation de n'auoir pas veu un de leurs accusateurs porté par quelque honneste homme : mais de les auoir veu trainer & pendre par les ruës, non pas par le Boureau, mais par les Colporteurs, qui se mettent eux mesmes la corde au col, parce qu'ils sont chargez de crimes. Lors que ie voyois courir ces fols par les ruës, & vendre leurs fueilles infames, ie m'estonnois comment ces Escriptuains pouuoient mettre tant de folies in folio. Ie suis marry qu'on a gasté tant de papier blanc & fin, pour des choses si noires & si grossieres. Ceux qui sont blamez dans ces ouurages, sont véritablement heureux; parce qu'ils n'ont point esté accusez par un sage & docte Escriptuain.

Ceux qui se meslent d'escrire doiuent auoir des plumes nettes & qui soient sans dens, c'est à dire, ils doiuent combattre le vice par generosité, & non pas l'inuenter par animosité. Est-il possible, que la Charité Chrestienne n'aye point touché les cœurs de ces vendeurs d'iniures. Est-il possible qu'ils aient eu la temerité de n'espargner pas des vies, qui ont l'odeur & la candeur des lys? Est-il possible qu'ils aient porté leurs calomnies iusques sur les Throsnes, & aient attaqué Dieu en attaquant ses viuantes Images? S'il n'est pas permis de faire paroistre au iour les vices où se porte le naturel de quelqu'un, combien est-il defendu d'inuenter du mal qui est inconnu à l'Enfer, pour en noircir la vie de ceux que nostre passion nous represente comme criminels. Si les saints Decrets excommunient ceux qui font des libelles diffamatoires, combien y a-t-il d'exco-muniez dans Paris, qui ont employé les noms les plus saints pour rendre leurs crimes plus specieux. Les noms de confession

generale, de *Salve Regina*, & *De Profundis*, ne sont plus en la bouche d'un pecheur penitent, mais ils seruent de tiltres à leurs infames escrits, lesquels ne donnent aucunes lumieres à l'Histoire de ce temps, que celles qu'ils rendent quand on les brule. Je ne m'arrestera point à refuter ce fatras de mensonges en particulier; Je les diuiseray seulement,

En diffamatoires, tels que sont les Apparitions du Marquis d'Ancre à Iules Mazarin : le Procez Criminel, qui fera faire le procez à son Autheur : l'amende honorable de Mazarin, qui n'a pas amendé celuy qui l'a inuentée, mais l'a rendu criminel deuant Dieu & deuant les hommes : La contribution d'un Bourgeois, qui contribuera beaucoup au chastiment de son Autheur : L'Horoscope de Mazarin : la France desolée aux pieds du Roy, que le peuple a foulé aux pieds, la iugeant indigne d'estre foulée par ceux d'un Roy. Le Politique du temps, qui n'est nullement poly en son discours. Le Discours d'Estat, dont les plus ignorans n'ont point fait d'estat ; & plusieurs Lettres & Harangues qui se ressentent du mauuais temps.

En impies, tels que sont la Confession Generale de Mazarin, qui fait confesser à tous generalement que cette bonne Confession fera vn iour faire penitence à celuy qui l'a faite. Le *Salve Regina*, & le *De Profundis* de Mazarin, qui deuroient faire chanter dans le petit Chastelet *Salve* à leurs Autheurs. La Lettre d'un Religieux à Monseigneur le Prince de Condé, qui ne fait point de scrupule de mentir impudemment, & qui se monstre plustost iniurieux que Religieux.

En iniurieux au Roy, à la Reyne, au Parlement & au public. Au Roy, comme l'entretien du Roy & de Monseigneur le Duc d'Anjou. Lequel entretien fait tort à ces deux personnes Royales, parce qu'il est trop bas pour des ames si nobles, parce qu'il les rend criminels, en mettant dans leurs bouches (qui ne doiuent s'ouuir que pour des Oracles) des paroles qui font parler toute la France, & souillent la pureté de leurs vies innocentes, en troublant la source. Iniurieux à la Reyne, tels que sont le Theologien d'Estat, duquel les meschans ont fait de l'estat, parce qu'il en faisoit fort peu de sa Majesté. La Decision de la question du temps, qui est venue dans vn bon temps, dans vn temps où le mensonge auoit lieu, & les iniures estoient

estoyent permises. Iniurieux au Parlement, comme la Lettre d'auis par vn Prouincial, qui auroit besoyn d'un bon aduis pour corriger sa Lettre d'auis. Iniurieux au public, car qui offense les parties, offense le corps, outre que c'est vne trop grande temerité aux Autheurs de ces ouurages de les faire paroistre en public, merittans seulement d'estre dans le priué, & de seruir à quelque fondement, estans sans aucun fondement. Celuy-là estoit plus estimé, qui auoit avec plus de passion attaqué l'estime de son Eminence. Celuy-là remportoit le prix, qui escriuoit qu'elle auoit tout pris. On ne trouuoit rien d'estrange dans celuy-là, pourueu qu'il dist en termes iniurieux que le Cardinal estoit estrange. Le Peuple couroit avec ardeur apres vn Libelle & l'acheptoit bien cher, où il lisoit qu'il estoit vendu à bon marché. En fin toutes les pieces estoient bien receuës aupres du vulgaire, qui luy persuadoient que son Eminence ne seroit pas bien receuë dans Paris. Seroit vne temerité à moy d'attaquer vn si grand nombre d'Escriuains, si ie ne sçauois que ne parlans tous ensemble que d'une mesme chose, ils se rendent confus à tout le monde & importuns.

Le nom d'Estranger fait le commencement & la fin de leurs discours. Ils repetent tous ensemble, que le Cardinal est indigne du ministere, parce qu'il est estrange & de bas lieu. Si les estrangers suiuiuent cette Politique, & ne donnoient ainsi aucunes charges au merite des François, on verroit bien tost la société humaine renuersée, & la vertu bornée dans les limites d'une Prouince ou d'un Royaume. Ceux qui reiettent les estrangers, doiuent reietter aussi toute sorte de beaux exemples de vertus qu'ils nous fournissent, doiuent approuuer l'oisiuereté qui corrompt ordinairement ceux, que le desir naturel de sçauoir n'attire point dans les pays estrangers; doiuent penser qu'ils sont estrangers dans ce monde, & ainsi l'interest particulier vnira les cœurs qui les desunissoit auparauant. Les ennemis des estrangers prouuent leur discours, ou plustost donnent cours à vn Arrest qui chasse du Gouvernement de France tous les estrangers.

Le mespris qu'on a fait de cet Arrest monstre facilement, que ceux qui l'auoient donné, auoient reconnu qu'il ne falloit point estre François necessairement pour estre honneste homme, & que les Pais Estrangers estoient aussi feconds en sages Politi-

ques que la France. L'Histoire de Charlemaigne prouue cecy, qui auoit conceu vne si haute estime des Estrangers, qu'il les employoit dans les armes, & leur confioit ses affaires, quoy que ses Sujets ne les peussent regarder dans les charges sans enuie.

Ceux qui poursuient son Eminence, disent dans plus de troiscens Libelles, qu'elle n'est pas seulement estrangere, mais encore de bas lieu. Est-il possible qu'un Chrestien puisse parler de la sorte. Le Cardinal est de bas lieu? Il ne tombera pas si tost, & ce bas lieu luy seruira tousiours de degré pour monter aux hautes & nobles actions. Le Cardinal est de bas lieu? Ceux qui ont vne naissance releuée, & vne haute fortune, voyent un precipice entre-deux, où la fortune ennemie precipitera la naissance. Le Cardinal est de bas lieu? La naissance est donc un astre, qui estant un peu plus bas, donne des inclinations rauallées à nos volontez, & estant un peu plus haut, semble leur inspirer le desir des nobles actions, & les engager dans l'heureuse necessité de tousiours bien faire. Voila mal raisonné; car on rencontre plus souuent dans la Noblesse des Ancestres des occasions d'oisiueté & de lascheté, plustost que des aiguilons pour les nobles entreprises & la generosité.

Il donne des armes à mes aduersaires pour me combattre; car ils peuuent conclure de mon discours, que le Cardinal a vne Eminence de Fortune, & non pas de naissance. Parler de la sorte, c'est dire que le Cardinalat sert seulement pour releuer la condition malheureuse de quelques miserables. C'est accuser de negligence & d'ignorance le Pape, dans la Promotion de son Eminence: de negligence, pour n'auoir pas, selon la coustume, recherché sa genealogie iusques dans sa source. D'ignorance, pour auoir ignoré que sa naissance estoit trop basse pour se loger sur l'Eminence d'un Cardinal, que l'escarlate de Rome n'estoit pas bien dans la poussiere, enfin que le Chapeau de Cardinal, avec ses grands & larges bords, demandoit un grand homme. La noblesse des Ancestres fait un chemin aux dignitez Ecclesiastiques, & saint Pierre n'ouure la porte de son Palais à personne, sans qu'il reconnoisse vne haute naissance, qui oblige heureusement à de hautes actions.

Ceux qui apres tout cela sont ignorans de la noblesse de son Eminence, doiuent faire profession par tout d'ignorance. Le

seul nom de MAZARIN les confond; car il n'y a rien de plus ancien, & rien qui soit si celebre à present: on a veu le Sceptre & ce nom portez par vn mesme homme: on voit à present vne Ville trouuer plus de gloire dans ce nom que dans ses richesses. *Mazara teli genus antiquum. Mazares prorex apud medos. Mazaris vrbs Sicilia.*

N'abaissez donc plus, Escriptuains infames, tous les Princes de l'Eglise, en rasechant de raualler la naissance du nostre; confidez-la sans passion, & vous reconnoistrez que son Eminence est semblable à l'aurore, qui porte vne noble escarlate dans sa naissance.

F I N.

